

Nuuk, 10. marts 2015

UPA2015/19

Raajanut qaleralinnullu licensit killeqanngitsumik piffissalerlugit pigineqartarnerisa Aalisarnej pillugu inatsisartut inatsisaat nr. 18, 31. oktober 1996-meersoq § 14 naapertorlugu, ukiunik tallimanik sioqqutsisumik ilimasaaruteqarnikkut killilerneqartalersinnaanerit aningaasaqarnikkullu kinguneqaatissai ilanngullugit - Naalakkersuisut UKA2015-imi saqqum-miussassamik misissueqqullugit Inatsisartut peqquneqarnissaannik aalajangiiffigisassaattut siunnersuut.

(Inatsisartunut Ilaasortaq Nikolaj Jeremiassen, Siumut)

Inatsisartunut ilaasortaq Nikolaj Jeremiassen aalajangiiffigisassamik siunnersuuteqarpoq tassalu raajanut qaleralinnullu licensit killeqanngitsumik piffissalerlugit pigineqartarnerisa allanngortinneqarnissaannik, ukiunik tallimanik sioqqutsisumik ilimasaaruteqarnikkut killilerneqartalersinnaanerit pillugu, Naalakkersuisut ukiakkut 2015 Inatsisartut ataatsimiinnissannut saqqummiussassamik misissueqqullugit tamannalu Partii Naleqqamiit oqaaseqarfigissavarput.

Aalisarnermi aaqquissuussinissaq siunissami pinngitsoorneqarsinnaanngitsoq inatsisinillu tulluarsaanissaq avataani sinerissamilu aalisarneruppat aaqqinniagassat annertuujusut oqaatigisariaqarpoq.

Sinerissami raajarniarnikkut killiffiit ajoraluartumik massakkut raajarniartunut pitsaanerpaajunngitsut nassuerutigisariaqarparput. Ukioq manna pisassat annertuumik apparneqarput sinerissami raajarniartunut assut ilungersunartumik.

Tassumalu kingunerisinnaasaa ajornerpaaq tassaavoq qaammatalunnguit ingerlaneranni sinerissami raajarniartut pisasaarullutik aalisarnerminnik unitsitsiinnarsinnaanerit, taamattoqassappat taava aalisariutit inuttaat suliffissaaruttunut ilanngutiinnartussaapput pisortanillu ikiorsiiffigineqarsinnaanatit tamannalu ilungersunarluinnartussaavoq. Aammalu aalisariutaatillit akiliisinnaajunnaaratarsinnaanerit pisassat ikippallaarnerit pissutigalugu qanittuararsuarmiippoq.

Nunami raajaleriffiit ikinnerulersinnaanerit aamma aarlerissutigissallugu pissutissaqarpoq aammalu suliffiit sulit ikinnerulernissaat pissappat aamma sulit suliffissaaleqisut amerlaneruleqqissapput.

Taamaattumik siunissami aalisarnikkut pitsaanerusumik atugassaqarfiusumik aaqqissuussisoqarnissaa tikinneqartariaqalerpoq.

Nalunngilarput raajarniarnermi pisassat ingerlatseqatigiiffinnut inunnullu ataasiakkaanut pituttugaasut, tamakkulu utertinneqassappata aamma piginnittuulersimasut torersumik oqaloqatigalugit aaqqiinniarnissat pinngitsoorneqarsinnaanngitsoq.

Naalackersuisut misissuinissaanni tassalu raajartassat qaleralittassallu killeqanngitsumik pigineqartarnerisa atorunnaarsillugit uterartinneqarnissaannut qulaajaasoqarnissaa sukumiisumik suliarineqassasoq kissaatigaarput.

Tassami kalluagassat annertoorujussupput ilaatigut piginnittunut aalisariutaatilinnut, suliffissuarnik kilisaatinillu piginnittut eqqarsaatigalugit, pisassammi pigineqalersimasut uterartinneqarnissaannut aningaasanik naleqarsinnaanerit takusinnaavarput.

Taamaattumik isumatusaartumik suliassap suliarineqarnissaa ingerlanneqartariaqarpoq. Nalunngilarput pisassat pigilerneqarsimasut tiguinnavillugit utertissinnaanngikkigit, taamatullu pisassanik utertitsisoqassappat nunatta karsiata akiliinissaa saneqqunneqarsinnaanaviannngimmat.

Qaleralinniat aamma pisassaannik uterartitsisoqassappat qularnanngilaq aamma sunniutissai taakununnga annertuujussasut, massakkut qaleralinniat pisassaatillit ilaasa aalisariutimik nutarterinernut allanullu soorlu motorilersuinernut qularnaveeqqutitut atorpaat, ingerlaannartumillu aamma tamakkua utertinneqassappata aningaaserivinnut qularnaveeqqutissat ajornartorujussuannussappat taamaattumik kukkunaveersaarluta aaqqissuussinissat ingerlattariaqarpagut.

Sinerissami qaleralinniartut nutaamik pisassalersuilluni aallartinnerat ingerlannartumik allanngortinneqassappat ajorluinnartussaavoq, taamaattumik taakununnga suliassat eqqarsarluarluni nalilersorneqartariaqarput, taakkuuppummi aamma pisassanik piginnittunngorsimasut.

Ilu Moorpoq aalisartut inuusuttut siunissami ineriartornissaat aqutissiuttariaqartoq. Aammalu inuiaqatigiit pisuussutaat inunnik amerlanerusunik iluaqutigineqarlutik atorneqarnissaat assortorneqarsinnaanngilaq, piginnittuuneq ataatsimut nalilersugassaavoq torersumik aaqqinniartariaqarmat inuit pisassanik pigisaqalersimasut peqatigalugit suliassaallutik.

Pissutsit massakkut killiffiusut ilungersunartuupput, aalisariutit nutaanngilisimasorujussuit massakkut aalisariutigineqarput aserfallaatsaaliinerillu assorujussuaq aningaasartuutaallutik.

Aalisariutit nutaanngitsut aserortigassaagaluit massakkut uninngaannartinneqarput aammalu 2015-imut aningaasaliissutissat pearniarneqarlutik taamatut aningaasanik peersiniarneq akuerineqarsinnaanngitsoq Partii Naleqqamiit oqaatigissavarput.

Ukiamut Naalackersuisut saqqummiussaqaarnissaat naammassineqarsinnaanera ilumut piviusorsioruunersoq eqqarsanarpoq. Tassami kalluagassat imak annertutigaat kinguneqaatissai tamaasa sukumiisumik misissorluartariaqarlutik.

Piginnittuulersimasunut pisasaanik utertitsisoqarpat nutaamik qanoq ilusilimmik
aaqqissuussisoqassanersoq eqqarsaatigilluartariaqarpoq pisassallu utertinneqartut aalisartunut
agguaateqqinneqarpata qanoq iluseqarsinnaanersut kattuffiit peqatigalugit
suliarilluarneqarnissaa kissaatigalugu kaammattuutigissavarput.

Suliassaq annertoqaaq allannguisoqarujussuarsinnaavoq misissuinissarlu qilanaaralugu
utaqqissavarput misissuinerillu takussutissalimmik naammassippata oqallittoqarnissaanut
qilanaarluta utaqqissaagut.

Hans Enoksen